

四庫全書

子部

欽定四庫全書

子部

古今事文類聚後集卷四十六

七

詳校官中書_臣孫衡

侍讀_臣孫球覆勘

總校官編修_臣王燕緒

校對官中書_臣趙秉淵

謄錄監生_臣孫承基

欽定四庫全書

古今事文類聚後集卷四十六

宋 祝穆 撰

羽蟲類

雞

羣書要語雞大者曰蜀雞未成曰健三尺為鷄絕有力

曰奮

爾雅

雞為積陽火德之精故陽出雞鳴以類感也

春秋

題詞

桃都山有大樹曰桃都枝相去三千里上有天雞日

初出照此木天雞即鳴天下雞皆隨之

玄中記

雞人掌夜

呼旦詔為官

周禮

巽為雞

牝雞無晨牝雞之晨惟家之

索

周書

祭宗廟之禮雞曰翰音

禮記

子事父母雞初鳴咸盥

漱

曲禮

雞棲于埘注鑿垣而棲為埘棲於杙為桀

國風

五母

雞

孟子

雞鳴狗吠相聞而達乎四境

同上

雞司晨

蜀楊顯傳

雞有

專棲之雄

抱朴子

連雞不能俱上於棲

戰國策

鳴雞戒旦則

飄爾晨征

文選趙景真書

詩句雞聲茅店月

溫庭筠

鄰雞凍不歌

山谷

晨雞喔喔鳴

劉禹

錫
夜半金雞啁啾鳴韓黃雞催曉丑時鳴白樂天

古今事實

雞鳴為善

雞鳴而起孳孳為善者舜之徒也孟子

聞雞相警

雞鳴思賢妃也哀公荒淫怠慢故陳賢妃貞女夙夜警
戒相成之道焉雞既鳴矣朝既盈矣匪雞則鳴蒼蠅之
聲蟲飛薨薨甘與子同夢會且歸矣無庶予子憎齊女風

曰雞鳴刺不悅德也陳古義以刺今不悅德而好色也
女曰雞鳴士曰昧旦子興視夜明星有爛將翔將翔弋
鳬與鴈鄭風

風雨不渝

風雨思君子也亂世則思君子不改其度焉風雨淒淒雞
鳴喈喈既見君子云胡不夷風雨瀟瀟雞鳴膠膠風雨
如晦雞鳴不已

殺雞為黍

子路遇丈人以杖荷蓀止子路宿殺雞為黍而食之

出犬雞詛

鄭伯使行出犬雞以詛射穎考叔者

自斷其尾

賓孟適郊見雄雞自斷其尾問之侍者曰憚其為犧也

昭公二十二年

雞有五德

田饒事魯哀公而不見察告哀公曰臣將去君黃鵠舉

矣哀公曰何謂也饒曰君不見夫雞乎頭戴冠者文也足搏距者武也敵在前敢鬪者勇也見食相呼者仁也守夜不失時者信也雞雖有五德君猶日淪而食之者何也以其所從來近也夫鵠一舉千里止君園池食君魚鰲啄君黍粱無此五德而君猶貴之以其所從來者遠也

韓詩外傳

雞鳴度關

見關市門

雞犬識家

見育聖門

雞犬得仙

見神仙門

獻長鳴雞

成帝時交趾越雋獻長鳴雞司晨雞卽下漏驗之晷刻

無差長鳴一食時不絕長距善鬪

西京雜記

姑盜食雞

見姑婦門

呼雞祝祝

祝雞翁雒陽人居尸鄉北山下養雞百餘牢雞皆有名

字千餘頭暮栖於樹晝日放散呼名卽種別而至

列仙傳

祝雞翁善養雞今世人呼雞云祝祝起此也

博物志

俗傳

雞本朱氏翁化為之故呼雞皆曰朱朱

風俗通

雞肋可惜

魏王入漢中討劉備不得進欲守復難意欲棄之乃發令云雞肋官屬不知主簿楊脩曰夫雞肋棄之則可惜噉之無所得王遂還

九州春秋

聞雞起舞

晉祖逖與劉琨俱為司州主簿情好綢繆共被而寢中

夜聞荒雞鳴蹴毘覺曰此非惡聲也因起舞相謂曰若
四海鼎沸豪傑並起吾與足下當相避於中原

火雞燒營

殷浩北伐辟江道為長史取雞百餘隻以長繩連之脚
皆繫火一時驅放羣雞駭散過塹飛集羌營皆燃因其
驚亂衆兵擊之

宋憲雞

晉兗州刺史沛國宋處宗嘗買得一長鳴雞愛養甚至

常籠着窓間雞遂作人語與處宗談論極有玄致終日

不輟處宗因此玄乃大進

幽寔錄

決爭雞訟

見官政門

知吏食雞

宋世良為清河太守發奸摘伏嘗有一吏休滿還郡食

人雞豚世良叱而語之叩頭伏罪

北史

古今文集

雜著

衛士傳雞唱

光黃人二三月羣聚謳歌不中音律宛轉如雞鳴耳與
宮人唱漏微相似但極鄙野漢官儀宮中不畜雞汝南
出長鳴雞衛士候於朱雀門外專傳雞唱又應劭曰今
雞鳴歌晉太康地道記曰後漢衛士習此曲於闕下歌
之今雞唱是也

志林

鳴雞賦

張文潛

先生閒居學道昧旦而興家畜一雞司晨而鳴畜之既

老語默有程意氣武毅被服鮮明我我朱冠丹頸玄膺
蒼距矯攫秀尾翹騰奉職有恪徐步我庭啄粟飲水孔
肅靡爭山川蒼蒼風霰宵凝黯幽窓之紈紈恍余夢之
初驚萬里一寂鐘鼓無聲聞振衣之膈膊忽孤奏之泠
泠委更籌之雜亂和城角之淒清應雲外之鳴鴻弔山
巔之落星歌三終而復寂夜五分而既更萬境皆作車
運馬行先生杖屨而出觀大明之東生

古詩

縛雞行

杜甫

小奴縛雞向市賣雞被縛急相喧爭家中厭雞食蟲蟻
不知雞賣還遭烹蟲雞於人何厚薄吾叱奴兒解其縛
雞蟲得失無了時注目寒汀倚江閣洪容齋云此詩自
是一段好議論至結句之妙非他人所能企及也

雞啼曲

李廓

星稀月沒入五更膠膠角角雞初鳴征人牽馬出門立
辭妻欲向長安行再鳴引頸茅簷下樓中角聲催上馬

纔分地色第三鳴旌旆紅塵已出城婦人上城亂招手
夫婿不聞遙哭聲長恨雞鳴別時苦不遣雞棲近窻戶
律詩

雞

杜甫

紀德名標五初鳴度必三殊方聽有異失次曉無慙問
俗人情似充庖爾輩堪氣交亭育際巫峽漏司南

雞

司馬君實

羽短籠深不得飛久留寧為稻粱肥膠膠風雨鳴何苦

滿室高眠正掩扉

鬪雞

羣書要語金嘴鐵距

六帖

前者如倒旁視如傾頭象規作

嘴似削成高膺峭峙雙翅齊平躍身竦體怒勢橫生爪
似煉銅目如奔星揚翅因風撫翮長鳴猛志橫逸勢凌
天庭或躑躅踟躕喞喞容與或爬地俯仰或撫翼未舉
或狼顧鴉視或鷹翔鵠舉或佯背而引敵或畢命於強
禦得勢者凌九天失據者淪九地

傅玄
賦

古今事實

介其雞

季郈之雞鬪

季平子郈伯二家相近故雞鬪

季氏介其雞

將芥子播其羽或曰以膠

沙播羽為介也

郈氏為之金距平子怒

怒其不下已

且讓之故郈伯

亦怨平子

昭公六年

養鬪雞

紀消子為周宣王養鬪雞十日而問之雞可鬪乎曰未也方虛驕而恃氣十日又問之曰未也猶疾視而盛氣

十日又問之曰幾矣望之如木雞其德全矣異雞無敢

應者也

列子

狸膏塗頭

莊子謂惠子曰羊溝

處

之雞三歲為秣

秣冠帥也

相者視

之則非良雞也然數以勝人者以狸膏塗其頭也

雞畏狸故

也

好鬪雞

宣帝好鬪雞

鬪雞賭錢

扶南山范尋公以鐵為鬪雞假距與諸將賭錢吳外國

鬪雞兵象

玄宗好鬪雞貴臣外戚皆尚之貧者或弄木雞識者以
為雞酉屬帝生之歲也鬪者兵象近雞禍也五行志

以鬪雞進

楊國忠以鬪雞進

楊妃外傳

古今文集

雜著

說天雞

羅隱

狙氏子不得父術而得雞之性焉其父畜養者冠距不
舉毛羽不彰兀然若無飲啄意洎見敵則他雞之雄也
伺晨則他雞之先也故謂之天雞狙氏死傳其術於子
且反先人之道非毛羽彩錯嘴距鈇利者不與其棲無
復問向時伺晨之儔見敵之勇戕冠高步飲啄而已吁
道之壞矣有是夫

古詩

鬪雞聯句

韓愈孟郊

大雞昂然來小雞竦而待
崢嶸顛盛氣洗刷凝鮮彩
高行若矜豪側睨如同殆
精光目相射劍戟心獨在
既取冠為冑復以距為鍛
天時得清寒地利挾爽塏
客格反

毛谷噤痺

所錄反

怒癭爭礪磊俄膺忽爾低
植立督而改

膈膊戰聲喧續翻落羽雉中
休事未決小挫勢益倍妒

勝務生敵賊性專相醢裂血
失鳴聲咏殷

烏間反

甚饑餒

對起何急驚隨旋仍巧給毒手飽李陽神搥困朱亥惻
心我以仁碎首爾何罪獨勝事有然傍驚汗流浼知雄
欣動顏怯負愁看賄爭觀雲填道助叫波翻海爭爪深
難解嗔睛時未怠一噴一醒然再接再礪乃頭垂碎丹
砂翼塌拖錦彩連軒尚賈餘清厲比歸凱選俊感収毛
受恩慙始隗英心甘鬪死義肉恥庖宰君看鬪雞篇短
韻亦可採

晚泊觀鬪雞

梅聖俞

舟子抱雞來雄雄峙高岸側行初取勢俯啄示無憚先
鳴氣益振奮擊心非惴勇頸毛逆張怒目皆裂肝血流
何所爭死鬪欲充玩應當邀猛殺豈獨專晨旦勝酒人
自私粒米誰爾喚紆懷彼興魏傍睨當衰漢徒然驅國
衆曾靡救時難羣雄自苦戰九錫邀平亂寶玉歸大姦
干戈託奇筭從來小資大聊用一長歎

律詩

鬪雞東郊道

陳褚玠

春郊鬪雞侶
棒敵兩逢迎
妒羣排袖出
帶勇向場驚
錦毛侵距散
芥羽雜塵生
還同戰勝罷
耿介寄前鳴

鬪雞

陳無已

崢嶸已介季氏甲
更以黃金飾兩戈
雖有英心甘鬪死
其如紀消木雞何

山雞

羣書要語一名錦雞
爾雅山雞有美毛
自愛其毛終日影

水目眩則溺

博物志

鵝鵝山雞也
利距善鬪世以家雞鬪

之則可擒其色鮮明五彩炫燿

南越志

巴峽中有吐綬雞

以其羽毛有白圓點又名真珠雞嗉藏肉綬長濶數寸

紅碧相間極煥爛常時不見須遇晴日則向陽擺之頂
首先出兩角肉亦二寸許然後徐舒其綬踰時悉斂於
嗉下披其毛不復見或有死者割其頸臆間亦無所覩

倦遊
雜錄

詩句歲蕤輕風裏若垂何可擬

李文饒

古今事實

鏡照而舞

魏武帝時南方獻山雞帝欲其鳴舞而無由公子蒼舒令以大鏡著其前雞鑑形而舞不知止遂至死常仲將

為之賦

異苑

古今文集

古詩

錦雞

歐陽永叔

蠻荆鮮人秀厥美為物怪禽鳥得之多山雞稟其粹衆

彩爛成文真色不可繪仙衣霓紛披女錦花繚綵輝華
日光亂眩轉目精憊高田啄秋粟下澗飲寒瀨清唳或
相呼舞影還自愛豈知文章累遂使羅網掛及禍誠有
媒求友反遭賣有身乃吾患斷尾亦前戒不羣世所驚
甚美衆之害稻梁雖云厚樊繫豈為泰山林歸無期羽
翮日以鍛用晦有前言書之可為戒

吐綬鳥

劉禹錫

越山有鳥翔寥廓嘹中天綬光若若越人偶見而奇之

因名吐綬江南知四明天姥神仙地朱鳥星精鍾異氣
赤玉雕成彪炳毛紅綃剪出玲瓏翅湖烟始開山日高
迎風吐綬盤花條臨波似染琅玕草映葉疑開王母桃
花紅草綠人間事未若靈禽自然貴鶴吐明珠暫報恩
鵲銜金印空為瑞春和秋霽野花開玩景尋芳處處來
翠幙雕籠非所慕珠丸柘彈莫相猜樓月啼烟陵縹緲
高秋先見金霞曉三山仙路寄遙情刷羽揚翹欲上征
不背碧雞依井絡願隨青鳥向層城太液池中有黃鵠

憐君長向卑枝宿何如一借羊角風來聽簫韶九成曲
律詩

山雞

溫庭筠

石壑動晴景山禽陵翠微繡翎翻草去紅嘴啄花歸巢
暖碧雲色影孤清鏡輝不知春樹畔何處又分飛

錦雞

王介甫

樊籠寄食老低催組麗深藏肯自媒天日清明聊一吐
兒童初見互驚猜

雁

鴻附

羣書要語鳬雁之醜其腳指間有膜蹠屬相著

爾雅鳴鵝

倉鳴雁也

廣雅

季冬之月雁北鄉月令大夫執雁取其候時

而行也婚禮納采用雁

儀禮

凡贄大夫用雁雁有先後行

列故以為贄

繁露

兄弟之齒以雁行

禮記

雁銜蘆以避矰繳

淮南子

譬若江湖之雀渤澥之鳥乘雁集不為之多雙鳬

飛不為之少

解嘲

梁州界有雁塞山相傳此山有大池水

雁棲集故名雁塞

梁州記

衡州有回雁峯雁至此不過遇

春而回

郡志

鴻雁鴻雁春北而秋南不失其時

管子

大曰鴻小曰雁

詩疏

鴻鵠羽毛純白似鶴而大肉美如雁

同上

孟春之月鴻雁

來季秋之月鴻雁來賓

月令

鴻漸于陸其羽可用為儀吉

漸鴻網之設魚則離之

新臺

鴻飛遵渚公歸無所於女信

處

狼跋

鴻飛冥冥弋人何慕焉

揚子

翼乎如鴻毛之遇順風

王褒
頌

詩句嗷嗷雲中雁

謝康樂

寄書雲間雁

范彦龍

金風新過雁

邊秋一雁聲 別浦雁賓秋 宿雁聚圓沙 落雁

浮寒水

杜並

戰蒲知雁唼

李義山

萬里衡陽雁今年又北歸

杜鴻雁幾時過江湖秋水多

杜

遵渚有來鴻

謝元暉

殘星

幾點雁橫塞

趙嘏

驚起暮天沙上雁海門斜去兩三行

杜牧

之仙掌月明孤影過長門燈暗數聲來

杜牧

北風驅鴈天雨

霜

鮑照

古今事實

烹不鳴鴈

莊子出於山舍故人之家令豎子請曰其一雁能鳴其一不能鳴請奚殺主人曰殺不能鳴者弟子問曰主人之雁以不材而死先生將何處莊子笑曰周將處夫材與不材之間

彎弓鴈落

更盈侍魏王見一雁過曰臣能搖弓而落乃彎弓雁即

落

家語

鴈足繫書

見書簡門

作朱鴈歌

漢武帝幸東海獲赤雁作朱雁之歌

在郡食鴈

後漢度遼將軍皇甫規解官東歸安定鄉人有以貨買
雁門太守者亦去職還家書刺謁卧不迎既入而問卿
前在郡食雁美乎

射鴈貫錢

晉朱漢賓少時善射嘗因與同輩出獵指一飛雁隨矢

而落其鏃正中其臆臆上貫一金錢有篆文示其郡之碩學皆無識者人甚異之由是號為朱落雁

鴻雁安集

以下係鴻雁

鴻雁美宣王也萬民離散不安其居而能勞來還定安集之至於矜寡無不得其所焉鴻雁于飛集于中澤之子于垣百堵皆作雖則劬勞其究安宅

獻鴻道飛

或以為鶴見鶴門

猶鴻有翼

桓公在位管仲隰朋見立有間有二鴻飛過桓公歎曰
仲父今彼鴻鵠有時而南有時而北四方無遠所欲至
而至焉惟有羽翼之故寡人有仲父猶飛鴻有羽翼也

戒食射鴻

衛獻公戒孫文子甯惠子食皆服而朝日旰不召而射
鴻於囿二子從之公不釋皮冠而與之言文子怒如戚

左傳

鴻安可籠

晉郭瑀隱於臨薤谷張天錫使蓋公明徵之瑀指翔鴻以示之曰此鳥也安可籠哉遂深逃跡公明拘其門人瑀歎曰吾逃祿非逃罪也豈得隱居行義害及門人乃出就徵

養鴻賞玩

盧思道遷武陽太守為孤鴻賦曰有離羣之鴻為羅者所獲野人馴養貢之於余置諸池庭朝夕賞玩用以銷

憂賦

序

古今文集

雜著

南人捕雁

雁宿於江湖之岸沙渚之中動計千百大者居其中令
雁奴圍而警察南人採捕者俟其天色陰暗或無月時
於瓦罐中藏燭持棒者數人屏氣潛行將欲及之則畧
舉燭便藏之雁奴驚叫大者亦驚頃之復定又如前舉
燭雁奴又驚如是數次大者怒啄雁奴秉燭者徐逼之

更舉燭則雁奴懼啄不復動矣乃高舉其燭持棒者齊入羣中亂擊之所獲甚多昔有淮南人張疑評事話之

此人親曾採捕

玉堂閒話

古詩

詠湖中雁

沈約

白水滿春塘旅雁每迴翔
唼流牽弱藻斂翮帶餘霜
羣浮動輕浪單泛逐孤光
懸飛竟不下亂起未成行
刷羽同搖漾一舉還故鄉

同昌叔賦雁奴

王介甫

雁雁無定棲隨陽以南北嗟哉此為奴至性能懇惻人
將伺其殆奴輒告之亟舉羣寐而飛機巧無所得夜或
以火取奴鳴火因匿頻驚莫我捕顧謂奴不直嗷嗷身
百憂泯泯衆一息相隨入矰繳豈不聽者惑偷安與受
紿自古有亡國君看雁奴篇禍福甚明白

鳴雁

韓愈

嗷嗷鳴雁鳴且飛窮秋南去春北歸去寒就暖識所處

天長地久棲息稀風霜酸苦稻梁微羽毛摧落身不肥
徘徊反顧羣侶違哀鳴欲下洲渚非江南水濶朝雲多
草長沙軟無網羅閒飛靜集鳴相和違憂懷惠性匪他
凌風一舉君謂何

律詩

孤雁

杜甫

孤雁不飲啄飛鳴聲念羣誰憐一片影相失萬重雲望
盡似猶見哀多如更聞野鴉無意緒啼噪自紛紛

雁

歐陽永叔

來時沙磧已冰霜飛過江南木葉黃
水濶天低雲暗澹朔風吹起自成行

早雁

杜牧

金河秋半擘絃開雲上驚飛四散哀
仙掌月明孤影過長門燈暗幾聲來
雖隨代馬翩翩去豈逐春風一一迴
莫厭瀟湘少人處水多菰米岸莓苔

雁

鄭谷

八月悲風九月霜
蓼花紅澹葦條黃
石頭城下波搖影
星子灣西雲間行
驚起漁家吹短笛
失羣征戍鎖殘陽
故鄉聞爾亦惆悵
何況扁舟非故鄉

鴛鴦

附鵝鵝

羣書要語鴛鴦水鳥鳬類雌雄未嘗相離人得其一則
一者相思死故謂之匹鳥

古今注

鴛鴦在梁戢其左翼注

止則相偶飛則成雙

詩

鴛鴦于飛畢之羅之

詩

鴛鴦兮

唯唯

楚詞

勝林鳥之同心
邁池魚之比目
魂上相思之樹

文連新錦之機

梁元帝賦

詩句客從遠方來遺我一端綺文彩雙鴛鴦裁為合歡

被

古樂府

江檻俯鴛鴦

杜

驚起鴛鴦豈無恨一雙飛去卻

回頭

杜牧

鸕鶿水鳥毛有五采

臨海異物志

詩句一雙鸕鶿對沈浮

古今事實

瓦化鴛鴦

魏文帝問周宣曰吾夢殿屋兩瓦墜地化為鴛鴦何也
宣對曰便宮常有暴死者帝曰吾詐卿耳宣曰夫夢者
意耳苟以形言後占吉凶言未卒黃門令奏宮人相殺

人化鴛鴦

大夫韓朋

一作憑

其妻美好康王奪之朋怨王囚之朋遂

自殺妻乃陰腐其衣王與之登臺自投臺下左右捉衣
衣不勝手遺書於帶下曰願以屍還韓氏而合葬王怒
令埋之兩塚相望經宿忽見有梓木生二塚之上根交

於下枝連其上又有鳥如鴛鴦常棲其樹朝暮悲鳴南
人謂此禽即韓朋夫婦之精魂

搜神記

鵝鵝呈祥

係鵝鵝

河南府尹闕前臨大溪每僚佐有入臺則水中先有小
灘漲出石礫金澄徹可愛牛僧孺為縣尉一旦忽報灘
出翌日宰邑與同僚列筵於亭上觀之有老吏云此必
分司御史若是西臺灘上當有鵝鵝一雙立前後以此
為則僧孺潛揣縣僚無已出者因舉杯曰既能有灘何

惜一雙鵲鵲宴未終俄有鵲鵲飛下不數日拜西臺御

史

劇談錄

古今文集

古詩

鴛鴦篇

陳子昂

飛飛鴛鴦鳥舉翮相蔽虧俱來綠潭裏共向白雲涯音
容相眷戀羽翮兩逶迤蘋萍戲春渚霰露繞寒池浦沙
連岸淨汀樹拂潭垂年年此遊玩歲歲來追隨鳳凰起

丹穴獨向梧桐枝鴻鴈來紫塞空憶稻梁施鳥啼倦依
託鶴鳴傷別離豈若此雙禽翻飛不異林刷羽清江浦
交頸紫山岑文章食奇色和鳴多好音聞有鴛鴦綺復
有鴛鴦衾特有美人贈勗此故交心

鴛鴦篇

李德裕

君不見昔時同心人化作鴛鴦鳥和鳴一夕不暫離交
頸千年尚為少二月草菲菲山櫻花未稀金塘風日好
何處不相依既逢解佩游女更值凌波宓妃精光搖翠

蓋麗色映珠璣雙影相伴雙心莫違淹留碧沙上蕩漾
洗紅衣春光兮宛轉嬉遊兮未反宿莫近天泉池飛莫
近長洲苑爾願歡愛不相忘須去人間羅網遠南有瀟
湘洲且為千里遊洞庭無苦寒沅江多碧流昔為薄命
妾無日不含愁今為水中鳥頡頏自相求洛陽女兒在
青閣二月羅衣輕更薄金泥文彩未足珍畫作鴛鴦始
堪着亦有少婦破瓜年春閨無伴獨嬋娟夜夜學織連
枝錦織作鴛鴦人共憐悠悠湘水濱清淺漾初蘋菖花

發艷無人識江柳逶迤空自春
惟憐獨鶴依琴曲更念孤鷺
隱鏡塵願作鴛鴦被長覆有
情人

律詩

鴛鴦

吳融

翠翹紅頸覆金衣灘上雙雙去
又歸長短死生無兩處可憐
黃鵠愛分飛

鴛鴦

曹組

蘋洲花嶼接江湖頭白成雙得
自如春晚有時描一對

日長銷盡繡工夫

鴛鴦

崔珣

翠鬢紅毛舞落暉
水禽情似此禽稀
暫分煙島猶回首
祇過寒塘亦並飛
映霧乍迷金殿瓦
逐梭齊上玉人機
採蓮無限蘭橈女
笑指中流候爾歸

鴛鴦

皮日休

雙絲絹上為新樣
連理枝頭是故園
翠浪萬回同過影
玉沙千處共棲痕
若非足恨佳人魄
即是多情年少魂

應念孤飛爭忍宿蘆花蕭颯雨昏昏

鈿鑲雕鏤費深功舞妓衣邊繡莫窮無日不來湘渚上
有時還在鏡湖中煙濃共拂芭蕉雨浪細雙遊菡萏
風應笑豪家鸚鵡畔年年徒被鎖金籠

鴛鴦

盧弼

雙浮雙浴傍苔磯蓼浦蘭皋繡帳幃長羨鴛鴦能潔白
不隨鸛鵒鬪毛衣霞侵綠渚香衾暖樓倚青雲殿瓦飛
應笑隨陽沙漠雁洞庭煙暖又思歸

律詩

係鷗

鷗鷗

杜甫

故使籠寬織須知動損毛青雲莫惆悵失水任呼號六
翮曾經剪孤飛卒未高且無鷹隼意留滯莫辭勞

鷗鷗

附鷗

羣書要語鷗也名水鴟

倉頡解詁

江鷗一名海鷗在漲海

中隨潮上下常以三月風至乃還洲嶼頗知風雲若羣

飛至岸必風

南越志

詩句泛渚白鷗輕 遠鷗浮水靜 江浦寒鷗戲 野

鷗浮白浪 鷗邊水葉開 鷗泛已春聲 春鷗懶避

船 白鷗波浩蕩 萬里誰能馴 並杜 心靜海鷗知 李白 相親

相近水中鷗 杜 惟有白鷗盟未寒 江南野水碧於天

中有白鷗閒似我 並山谷 舍南舍北皆春水 但見羣鷗日

日來 杜

鷺水鳥毛白而潔 故謂之白鳥 齊魯之間 謂之春鋤青
腳高尺餘 解指尾喙長三寸許 頂上有毛十數枝 毵毵

然詩

一名屬玉似鵠鵲

三輔黃圖

振鷺于飛于彼西雝

周振

振鷺

同上

詩句鈎簾宿鷺起

沙頭宿鷺連拳靜

又如雪點楚

山雲

並杜

屬玉飛來水滿塘

蘇養直

水遠山長雙屬玉身閒

心苦一春鋤

山谷

古今事實

海翁狎鷗

海上之人好鷗者每旦之海上從鷗鳥遊鷗鳥之至者

百數而不止其父曰吾聞鷗鳥皆從女好取來吾玩之
明日之海上鷗鳥舞而不下

列子

鷺羽扇

鷺係

張融年弱冠同郡道士陸修靜以白鷺羽扇遺之曰此
異物奉異人

南史

古今文集

古詩

白鷗

王介甫

江鷗好羽毛玉雪無塵垢滅沒波浪間生涯亦何有雄
雌屢驚矯機弋常紛糾顧我獨無心相隨如得友飄然
紛華地此物乖隔久白髮望東南春江綠如酒

律詩

鷗

杜甫

江浦寒鷗戲無他亦自饒卻思翻玉羽隨意點春苗雪
暗遷延落風生一任飄已羣滄海上清影日蕭蕭

題韓魏公狎鷗亭

歐陽永叔

險夷一節如金石，勲德俱高映古今。
豈止忘機鷗鳥信，陶鈞萬物本無心。

魏公得詩喜曰：余在中書進退升黜，未嘗置心於

其間。永叔可謂知我。

古今詩話

古詩

以下係鷺

白鷺兒

劉禹錫

白鷺兒最高格，毛衣新成雪不敵。
衆禽喧呼獨疑寂，孤眠芊芊草久立。
潺潺石前山正無，雲飛去入遙碧。

律詩

鷺鷥

張祐

深窺思不窮，揭趾淺沙中。
一點山光淨，孤飛潭影空。
暗棲松葉露，雙下蓼花風。
好是滄波侶，垂絲意亦同。

謝紫微以畫鷺二軸為寄

梅聖俞

白鷺畫雙素粉毫，幽趣多翹沙。
依折葦刷羽，對衰荷浦思。
懸秋碧江清憶釣蓑，因君遠相寄。
時詠到滄波。

鷺絲鳥

鄭谷

閒立春塘煙澹澹靜眠寒葦雨颼颼漁翁歸後汀沙晚
飛下灘頭更自由

鷺鷥

杜牧

霜衣雪髮青玉嘴羣捕魚兒溪影中驚飛遠映碧山去
一樹梨花落晚風

鷺鷥

羅隱

斜陽澹澹柳陰陰風裊寒絲映水深不要向人誇潔白
也知常有羨魚心

鷺鷥

歐陽永叔

風格孤高塵外物性情閒澹水邊身
盡日獨行溪淺處
青苔白石見纖鱗

雙鷺

陶雍

雙鷺應憐水滿池風飄不動頂垂絲
立當青草人先見
行傍白蓮魚未知一足獨拳寒雨裏
數聲相伴早秋時
林塘得爾須增價況是詩家物色宜

鷓鴣

羣書要語鷓鴣不生卵而孕雛於池澤間

異物志

倭國水

多陸少以小環挂鷓鴣項令入水捕魚取以充食

隋書

詩句鷓鴣西日照曬翅滿魚梁

杜

古今事實

白鷓鴣

唐貞元十三年上以時雨未降幸興慶宮行雩祀忽有

白鷓鴣羣類翼從咸驚異之果大雨滂沱

唐紀

古今文集

律詩

鸕鷀

杜荀鶴

一般毛羽結羣飛兩岸煙江好景時
深水有魚銜得出
看來卻是鸕鷀餓

古今事文類聚後集卷四十六

欽定四庫全書

古今事文類聚後集卷四十七

宋 祝穆 撰

羽蟲類

鵝

羣書要語鵝一名野雁江東人謂之鳴爾雅駕鵝野鵝也

廣志鵝善鬪好啖蛇古今注舒雁翠注翠尾內則鵝性頑而傲

齊下彬禽

獸決錄

詩句鵝兒黃似酒對酒愛新鵝杜不教鵝鴨惱比鄰杜

古今事實

食鵝出哇

陳仲子居於陵有饋其兄生鵝者已嘖蹙曰惡用是鵝

鵝鵝聲者為哉他日母殺鵝食之其兄曰是鵝鵝之肉也

出而哇之

寫經博鵝

晉王羲之性愛鵝會稽有姥養一鵝善鳴求市未能得

遂攜親友就觀姥聞羲之將至烹以待之羲之歎惜彌
日又山陰有道士好養鵝羲之往觀焉意甚悅固求市
之道士云為寫道德經當舉羣相贈耳羲之欣然寫畢
籠鵝而去

求子鵝炙

劉毅家在京口酷貧嘗與鄉曲士大夫往東堂共射時
庾悅為司徒右長史要府僚佐出東堂毅已先至遣與
悅相聞曰身並貧躋營一遊甚難君如意人無處不可

為適豈能以堂見讓悅不答時衆人並避惟毅留射如
故悅厨饌甚盛不以及毅毅既不去悅甚不歡毅又相
聞曰身今未得子鵝豈能以殘炙見惠悅又不答及毅
貴奏解悅都督將軍官深相挫辱悅不得志疽發背少
日而卒

鵝聽講經

淨影寺沙門慧遠講經初在鄉養一鵝常隨遠聽經及
遠入京留在寺晝夜鳴噪不止僧徒送入京至此寺大

門放之自然知遠房便入馴狎每聞講經即入堂伏聽
若聞泛說他事則鳴翔而出如是六年忽哀咷庭宇不
肯入堂二旬而遠卒寺內有遠碑亦述其事

兩京記

隻鵝送別

何遠為武康令人甚稱之太守王彬巡屬縣諸縣皆盛
供帳以待焉至武康遠獨設糗水而已彬去遠送之拜
斗酒隻鵝而別彬戲曰卿禮有過陸納將不為古人所

笑乎

南史

繫鵝求妾

庾信自建康遁歸江陵湘東王因賜妾徐氏妾與任撝私通撝欲求之無致言者信庭前有一蒼鵝乃繫書於

鵝頸信視之乃撝啓遂題紙尾曰畜生乞汝

三國典畧

食鵝知色

符朗食鵝知黑白之處不信既而試之果然

秦記

啖鵝草詔

齊高帝引江淹入中書省先賜酒食淹素能飲啖食鵝

炙垂盡飲酒數升文詔亦辦

水鵝達表

唐高祖義兵出河東隋將堯君素城守時圍甚急君素
乃為木鵝置表於頸具論事勢浮之黃河下河陽守者
得之達於東都越王侗見而嘆息

襲城驚鵝

唐元和間李愬襲蔡州兵至懸弧城夜半雪甚城旁有
鵝鴨池愬令驚擊之以混軍聲

好鬪鵝

唐令孜傳僖宗好鬪鵝數幸六王宅興慶池與諸王鬪
鵝一鵝至十萬錢

鵝能警盜

東坡云鵝能警盜亦能却蛇且又有祈雨厄悲夫

林志

古今文集

古詩

題畫鵝

黃魯直

鴛鴦引頸回似我胸中字右軍數能來不為口腹事

律詩

得房公池鵝

杜甫

房相西亭鵝一羣眠沙泛浦白於雲鳳凰池上應迴首
為報籠鵝王右軍

鵝

李商隱

眠沙卧水自成羣曲岸斜陽極浦雲那解將心憐孔雀
羈雌長共故雄分

吳執中有兩鵝為余烹之戲贈

黃魯直

學書池上一雙鵝宛頸相追筆意多皆為涪翁赴湯鼎
主人言汝不能歌

世以婢子為鵝謂吳貴鴨而賤鵝也

鴨

附

羣書要語鳬鶩鴨也

廣雅

鴨一名舒鳬

爾雅

鶩野鳬也

說文

家

曰鳬野曰鴨

李巡云

雞伏鴨卵雛成入水雞母隨岸呼之

雛出而不隨母鴨雞異類能相隨也

風俗通

啞喋啄食雛

襍帶雛

李邕關鴨賦

鴨足何以販雛足何以斲

傅子云

詩句我衰寄江湖老伴雞鵝鴨坡願為穿雲鵲笑作將

雛鴨

坡

拊掌動鄰里遠村捉鵝鴨

坡

曲池眠乳鴨

鳬春草雞翹鳬翁濯顏注鳬水鳥翁頸上有毛

史游急就章

鳬得水藻言喜悅也

後漢劉陶議註

鳬脰雖短續之則悲

莊子鳬

鷺在沙

大雅

寧與騏驎抗軓乎將與雞鶩爭食乎寧昂昂

若千里之駒乎寧泛泛若水中之鳬與波上下而以全

吾軀乎

漁父

雙鳬飛不為加少

解嘲

鳬雁常在海邊沙上食

沙石皆消爛惟食海蛤不消隨其糞出

古今注

詩句二鳬俱北飛一鳬獨南翔

李陵

浴鳬翻雪羽

杜牧

沙上

鳬雛傍母眠

杜

相趣鳬鷗入槳牙

杜

江心嘯嘯鳬雛鳴

張籍

鳬雛散亂棹謳發

杜

古今事實

作鬪鴨欄

建昌侯孫慮於堂前作鬪鴨欄頗施小巧陸遜正色曰

君侯宜勤覽經典用此何為慮即毀之

吳志

斃鴨償金

陸龜蒙居震澤之南巨積莊有鬪鴨一欄有驛使過挾彈斃其尤者龜蒙手一表本云此鴨能作人語待附蘇州上進使者斃之奈何使人恐酬以橐中金俟其稍悅方倩語之猶曰能呼其名使人憤且笑拂袖上馬復召之還其金曰吾戲耳

雙鳥飛鳬

以下係鳬

王喬為葉令喬有神術每月朔旦常自縣詣臺朝帝怪其來數而不見車騎密令太史伺望之言其臨至輒有雙鳬從東南飛來於是候鳬至舉網張之但得一雙履乃詔尚方譎視則曰所賜尚書官屬履

辨海鳬毛

人有得鳬鳥毛長三丈以示張華華見曰不然此謂海

鳬毛也出則天下亂

博物志

古今文集

古詩

水鴨

司馬君實

襤褸出短蒲
毳毼浴清水
物忌太鮮明
何妨染泥滓

莫打鴨

梅聖俞

事見妓門

莫打鴨打鴨
驚鴛鴦鴛鴦
新向西池落
不比孤洲老
禿鶻禿鶻尚
欲遠歸去何
况鴛鴦羽翼
長

詩話

評睡鴨詩

徐陵鴛鴦賦云山雞映水那相得孤鸞照影不成雙天下真成長會合無勝比翼兩鴛鴦黃魯直題畫睡鴨曰山雞照影還自愛孤鸞舞鏡不作雙天下真成長會合兩鳬相倚睡秋江全用徐語點化之末句尤精工

容齋隨筆

律詩

係鳬

鳬

李嶠

颯沓睢陽淚浮遊漢渚隈錢飛出井見鶴引入琴哀李

陵賦詩罷王喬曳舄來何當歸太液翔集動成雷

精衛

羣書要語有鳥如烏文首白喙赤足名曰精衛

博物志

古今事實

精衛填海

昔炎帝女溺死東海中化為精衛每銜西山木石以填

東海而溺死也

述異記

古今文集

古詩

精衛詞

王建

精衛誰教爾填海海邊石子青磊磊但得海水作枯池
海中魚龍何所為口穿豈為空銜石山中草木無全枝
朝在樹頭暮海裏飛多羽折時墮水高山未盡海未平
願我身死子還生

伯勞

附象

羣書要語鵙伯勞也

爾雅

一名博勞一名伯趙

廣雅

仲夏之

月鵲始鳴

月令七月鳴鵲

幽風

詩句東飛伯勞西飛燕

古樂府

南窗北窗桂月光

東飛伯勞歌

梟不孝鳥也至日捕梟磔之

說文

梟子大食其母

淮南子注

北

方梟人家以為怪共惡之南中晝夜飛鳴與鳥鵲無異

桂林人羅取生鬻之家家養使捕鼠以為勝狸

嶺表錄異

古今事實

伯勞集李

東方朔與弟子偕行渴令弟子扣道邊家求飲不知姓

名主人開門不與須臾見伯勞飛集主人門中李樹上
朔謂弟子曰此主人姓李名伯勞爾但呼李伯勞果有
李伯應即入取飲

別傳

請穰臬恠

以下係臬

齊景公為露寢之臺成有臬鳴甚惡之栢常騫曰請為
穰之夜用事明日問曰今旦聞臬鳴乎公曰一鳴而不
復聞使人往視之臬當陞布翼伏地而死

說苑

諱言不孝

男子畢康殺其母詔焚燒其屍暴其罪於天下余上章
言宣帝時公卿朝會丞相語曰聞臬生子長且食其母
寧然有賢者應曰但聞烏子反哺耳丞相大慙君子之
於鳥獸尚為之諱况人乎

桓譚
新論

臬鳴戰勝

晉張重華為石季龍所攻重華使謝艾為中堅將軍引
師出振武夜有二臬鳴牙中尅敵之兆於是進戰大破
之

梟鳴改官

有梟鳴於張率更庭樹其妻以為不祥連唾之張聞之

曰急灑掃吾當改官言未畢賀者已在門

唐書

古今文集

雜著

惡鳥論

伯勞

魏陳王曹植

國人有以伯勞生獻者王召見之侍臣曰世間惡伯勞之聲敢問何謂也王曰昔尹吉甫用後妻之讒殺孝子

伯奇吉甫後悟追傷伯奇出遊於田見鳥鳴於桑其聲
噉然吉甫動心曰伯奇乎鳥乃撫翼其音尤切吉甫乃
顧曰伯勞乎是吾子栖吾輿非吾子飛勿居鳥尋聲而
栖其蓋歸入門集於井幹之上向室而號吉甫命後妻
載弩射之遂射殺後妻以謝之故俗惡伯勞言所鳴之
家必有凶也梟鵂之鳴弗可更者天性然也昔荆之梟
將巢於吳鳩遇之曰何去荆而巢吳乎梟曰荆人惡予
之聲鳩曰子如不能草子之音則吳楚之民不易情也

為子計者若宛頸戢翼終身勿復鳴也昔議朝會者有人問曰寧有聞梟食其母有答之者嘗聞烏反哺未聞梟食其母聞者慙惡不善也得螭者莫不馴而放之為利人也得蚤者莫不縻之齒牙為害身也鳥獸昆蟲猶以名聲見異况夫吉士之與凶人乎

鵩鵩

鵩鵩 鬼車並同

車載板 訓狐附

羣書要語鵩鵩惡鳥也一名鵩一名鵩鵩

說文

鵩入人家

凶賈誼所賦鵩是也其肉甚美可為羹臠又可炙

詩疏鵩

胖人亦尚之

內則

翩彼飛鴉集于泮林食我桑椹懷我好

音

魯頌

若族氏掌覆天鳥之巢

周禮

庭氏掌射國中之天鳥

上同鴝鵒嗜鼠

莊子

鴝鵒即鴝也一名姑獲為圖

音

可以聚

諸鳥鴝鵒晝日目無所見夜則飛撮蚊蚋鴝鵒乃鬼車之屬也皆夜飛晝藏或好拾人爪甲則知吉凶凶者輒鳴於屋上知其將有咎耳故人除指甲埋之戶內蓋忌此也亦名夜遊女好與嬰兒作祟故嬰兒之衣不可置星露下畏其祟耳又名鬼車春夏之交稍遇陰晦則飛

鳴而過嶺外尤多愛入人家鑠人魂氣或云常滴血
滴之家則有凶咎

太平廣記

鴝鵒一名忌欺白日不見人夜

能拾蚤蝨

雜志

鬼車正月七日多鬼車鳥度家家槌門打戶捩狗耳滅

燈燭禳之

荆楚歲時記

古今事實

鴝鵒毀室

鴝鵒周公救亂也成王未知周公之志公乃為詩以遺

王名之曰鵽鵽鵽鵽鵽鵽既取我子毋毀我室恩斯
勤斯鬻子之閔斯

歌鵽寓諷

陳辯女者陳國採桑之女也晉大夫解居甫使於宋道
過陳遇採桑之女而戲之曰女為我歌吾將舍女乃為
歌曰墓門有棘斧以斯之夫也不良國人知之知而不
已誰昔然矣又曰為我歌其二女曰墓門有梅有鵽萃
止夫也不良歌以訊之訊予不顧顛倒思予大夫曰其

梅則存其鴉安在女曰陳小國也攝乎大國之間因之以饑饉加之以師旅其人且亡而況鴉乎大夫嘆異而

釋之

列女傳

好鴉炙

王羲之好鴉炙

使捕鵠

鵠係鵠

侯景入臺城在昭陽殿廊下居處常有鵠鵠鳥鳴呼景

惡之使人窮山野捕焉

南史

符奏鳥死

尹軌字公度人有怪鳥鳴其屋上者以語公度公度為

一奏符着鳥鳴處其夕鳥伏符下

神仙傳

古今文集

古詩

病鵑

韓愈

屋東惡水溝有鵑墮鳴悲青泥揜兩翅拍拍不得離羣
童叫相召瓦礫爭先之計較生平事殺却理亦宜奪攘

不愧恥飽滿盤天嬉晴日占光景高風送追隨擬凌鷹
鳳羣肯顧鴻鵠卑今者運命窮遭逢巧丸兒中汝要害
處汝能不得施於吾乃何有不忍乘其危救汝將死命
浴以清水池朝餐輟魚肉暝宿防狐狸自知無以致蒙
德久猶疑飽入深竹叢饑來傍階基諒無責報心因以
聽所為昨日有氣力飛跳弄藩籬今晨忽徑去曾不報
我知悻悻非汝福天衢汝休窺京城事彈射豎子豈易
欺勿諱泥坑辱泥坑乃良規

律詩

鵑

王介甫

喻小人不足道又有附之以顯者

依傍秋風氣象豪似欺黃雀在蓬蒿不知羽翼青冥上
腐鼠相隨勢亦高

雜著

鵑係

鵑鳥賦

賈誼

誼為長沙王傅三年有鵑鳥飛入誼舍止於坐隅似鵑

不祥鳥也。誼既以謫居長沙，長沙卑濕，誼自傷悼，以為壽不得長，乃為賦以自廣其辭曰：

單閼之歲四月，孟夏庚子日，斜鵬集余舍，止於坐隅。貌甚閒暇，異物來，崕私怪其故，發書占之，識言其度曰：野鳥入室，主人將去。問於子鵬，余去何之？吉乎？告我凶言。其災淹速之度，語余其期。鵬乃太息，舉首奮翼，口不能言。請對以意。萬物變化，固無休息。幹流而遷，或推而還。形氣轉續，變化而嬗。沕穆無間，胡可勝言。禍兮福所倚。

福兮禍所伏憂喜聚門吉凶同域彼吳强大夫差以敗
越棲會稽勾踐霸世斯遊遂成卒被五刑傳說胥靡乃
相武丁夫禍之與福何異糾纏命不可測孰知其極水
激則旱矢激則遠萬物回薄震盪相轉雲蒸雨降糾錯
相紛大鈞播物塊圯無垠天不可預慮道不可預謀遲
速有命烏識其時且夫天地為爐造化為工陰陽為炭
萬物為銅合散消息安有常則千變萬化未始有極忽
然為人何足控揣化為異物又何足患小智自私賤彼

貴我達人大觀物無不可貪夫徇財烈士徇名夸者死
權品庶每生怵迫之徒或移西東大人不曲億變齊同
愚士繫俗僭若囚拘至人遺物獨與道俱衆人惑貳好
惡積意真人恬漠獨與道息釋智遺形超然自喪寥廓
忽荒與道翱翔乘流則逝得坎則止縱軀委命不私與
已其生兮若浮其死兮若休澹乎若深淵之靜泛乎若
不繫之舟不以生故自寶養空而遊德人無累知命不
憂細故芥蒂何足以疑

古詩

係鬼車

車載板

即鬼車

王介甫

荒哉我中國珍菓所不產朝暮惟有鳥自呼車載板楚
人聞此聲莫有笑而莞而我更歌呼與之相往返視遇
若搏黍好音而睨睨壤壤生死夢久知無可揀物敝則
歸土吾歸其不晚歸歟汝隨吾可相蒿里挽

鳥有車載板朝暮常一至世傳鵬似鴉而此與鴉似惟
能預人死以有此名字疑即賈長沙當時所遭值洛陽

多少年擾擾經世意粗聞方外語便釋形骸累吾衰久
捐書放浪無復事尙自不見我安知汝為異憐汝好毛
羽口音亦清麗胡為太多知不默而見忌楚人既憎汝
彈射將汝利且長隨我遊吾不汝棄哉

鬼車

梅聖俞

嘉祐六年秋九月二十有八日天愁無光月不出浮雲
蔽天衆星沒舉手向空如抹漆天昏地黑有一物不見
其形但聞其聲其初切切淒淒或高或低乍似玉女調

玉笙衆管參差而不齊既而咿咿呦呦若軋若抽又如
百兩江州車回輪轉軸聲啞嘔鳴機夜織錦江上羣雁
驚起蘆花洲吾謂此何聲初莫窮端由老婢撲燈呼兒
曹云此怪鳥無匹儔其名爲鬼車夜載百鬼凌空遊其
身雖小聲甚大翅如車輪排十頭凡鳥有一口其鳴已
啾啾此鳥十頭有十口十口挿一舌連一喉一口出一
聲千聲百響更相誚昔時周公居東周厭聞此鳥憎若
讎夜呼庭氏率其屬鸞弧俾逐出九州射之三發不能

中天遣天狗從空投自從狗齧一齒落斷頭至今清血流
邇來相距三千秋晝藏夜出如鵠鷗每逢陰黑天外
過乍見火光驚輒墮有時餘血下點污烏卧反所遭之家
家必破我聞此語驚且疑反祝疾飛無我禍我思天地
何茫茫百物鉅細理莫詳吉凶在人不在物一蛇兩頭
反為祥却思老婢炷燈火卷簾開戶清華堂須臾雲散
衆星出夜靜皎月流清光

古詩

係訓狐

射訓狐

韓愈

有鳥夜飛名訓狐，矜凶挾狡誇自呼。乘時陰黑止我屋，
聲勢慷慨非常粗。安然大唳誰畏忌，造作百怪非無須。
聚鬼徵妖自明扇，擺掉拱角頽堅塗。慈母抱兒怕入席，
那暇更護雞窠雛。我念乾坤德泰大，卵此惡物常勤劬。
縱之豈即遽有害，斗柄行指西南隅。誰謂亭姦計尤劇，
意欲唐突羲和烏。侵更歷漏意彌厲，何由傲倖休須臾。
咨余往射豈得已，候汝两眼張。盱眙臬驚墮，梁蛇走竇。

一失斬頸羣離枯

衆禽

羣書要語希有鳥崑崙山有鳥名希有張左翼覆東王

公右翼覆西王母

神異經

比翼鳥南方有鳥不比不飛其名無無一目一翼相得

乃飛

爾雅

木客鳥大如鵲數千百頭為羣飛有度不與衆鳥相廁

異物志

鵜鴂一名鵜澤

爾雅

水鳥也大喙長尺餘頷下大如數升

囊若小澤有魚能抒水滿其頷含水竭盡魚在地乃共

食之故曰淘河

詩疏

思歸鳥狀如鳩而慘色三月則鳴其音云不如歸去

陶岳

零陵

記

古今事實

青鳥先集

武帝七月七日於承華殿齋忽有青鳥從西方來集殿

前上問東方朔朔曰此西王母欲來也有頃王母至

漢武

故事

鵲雀銜鱣

後漢楊震字伯起年五十始應州郡辟衆人謂之晚暮
夜有鵲雀銜三鱣魚飛集講堂前都講取魚進曰蛇鱣
者卿大夫服之象也數三者法三台也先生自此升矣

古今文集

古詩

鷓鴣吟

劉禹錫

朝陽有飛鳳不聞千萬祀鷓鴣催衆芳畏聞先入耳秋
風白露晞從是爾啼時如何上春日唧唧滿庭飛

四禽言

梅堯臣

泥滑滑苦竹岡雨蕭蕭馬上郎馬蹄凌兢雨又急此鳥
為君應斷腸

婆餅焦兒不食爾父向何之爾母山頭化為石山頭化
石可奈何遂作微禽啼不息

提葫蘆沽笑酒風為賓樹為友山花撩亂目前開勸爾
今朝千萬壽

不如歸去春山雲暮萬木兮參天蜀天兮何處人言有
翼可歸飛安用空啼向高樹

五禽言

蘇子瞻

使君向蘄州更唱蘄州鬼我不識使君寧知使君死人
生作鬼會不免使君已老知何晚

王元之自黃移蘄州聞啼鳥問其名或對曰此名

蘄州鬼元之大惡之果卒於蘄

南山昨夜雨西溪不可渡溪邊布穀思勸我脫布袴不
辭脫袴溪水寒水中照見催租瘢

去年麥不熟挾彈規我肉今年麥上場處處有殘粟豐
年無象何處尋聽取松間快活吟

力作力作蠶絲一百箔壠上麥頭昂林間桑子落願儂
一箔千兩絲繅絲得蛹飼爾雛

姑惡姑惡姑不惡妾命薄君不見東海孝婦死作三年

乾不如漢龐姑去却復還

戲和答禽語

黃魯直

南村北村雨一犁新婦餉姑翁哺兒田中啼鳥自四時
催人脫袴著新衣著新替舊亦不惡去年租重無袴著

五禽言和王仲衡尚書

朱元晦

提葫蘆沽美酒春風浩蕩吹花柳不用沙頭雙玉瓶鳥
歌蝶舞為君壽祇今一醉是君恩昨日之愁愁殺人
不如歸去孤城越絕三春暮故山只在白雲間望極雲

深不知處不如歸去不如歸千仞岡頭一振衣

泥滑滑泥滑滑秦望雲荒鏡湖闊綠秧刺水水拍堤牙
旗畫舸凌風發使君行樂三江頭泥滑水深君莫憂

脫袴脫袴桑葉陰陰墻下路回頭忽憶舍中妻去年已
逐他人去舊袴脫了却不辭新袴知教阿誰做

麥熟吟去年種麥有德音祇今種熟誰快活種者已卧
官墻陰仁公有政惠存歿肯使催租更賸突

次向和卿韻

黃魯直

雪泥滑滑封山郭，提壺勸姑亦不惡。
林中解道不如歸，家人應念思歸樂。

律詩

和思歸

白居易

山中不棲鳥，夜半聲嚶嚶。
似道思歸樂，行人掩泣聽。

絕句

韓愈

喚起窗全曙，催歸日未西。
無心花裏鳥，更與盡情啼。

畫眉鳥

歐陽永叔

百轉千聲隨意移
山花紅紫樹高低
始知鎖向金籠聽
不及林間自在啼

聞竹雞

楊廷秀

山行三日厭泥行
幸自今晨得一晴
又聽數聲泥滑滑
情知浪語也心驚

白頭公

魏野

有何辛苦有何愁
箇箇林間盡白頭
細葉累累巢花影暖
微蟲共食竹陰秋
清音豈許黃鶯伏
素羽曾教白鷺羞

惟爾鬢毛應似我相逢不用話因由



古今事文類聚後集卷四十七

欽定四庫全書

子部

古今事文類聚後集卷

四十八至
五十

詳校官中書臣孫衡

侍讀臣孫球覆勘

總校官編修臣王燕緒

校對官中書臣趙秉淵

謄錄監生臣孫承基

欽定四庫全書

古今事文類聚後集卷四十八

宋 祝穆 撰

蟲豸類

蜜蜂

衆蜂附

羣書要語有蜜謂之壺蜂方言玄蜂若壺楚辭蜂有兩衙應

潮

雅

蘓蘓華華雖無官職一日兩衙見履射射繁布金房疊

構玉宇咀嚼華滋釀以為蜜散似甘露疑如割肪冰鮮

玉潤髓滑蘭香

郭璞賦

凡蜂作蜜皆須人小便以釀諸花

乃得成熟狀似作飴須藥也

本草

詩句花暖蜜蜂喧

天寒割蜜脾

柱穿蜂溜蜜

並杜可

憐採花蜂清蜜寄兩股

坡

蜜蜂為主各磨牙咬盡村中

萬樹花

孟郊

花底山蜂遠超人

杜

遊蜂多思正經營

韓黃

蜂衙退海潮上

錢伯高

稚蜂趨衙供蜜課

山谷

衆蜂土蜂大在土中作房子可啖木蜂小在樹上作房

爾雅

莫予莽蜂自求辛螫

周頌

蜂蠆有毒

左傳

蜂蠆垂芒

孝經援神

契蜂有攻寡之義

抱朴子

猛獸在田荷戈而出凡人能之

蜂蠆在於懷袖勇夫為之驚駭

晉鄒湛傳

人能搏猛獸而不

能無變色於蜂蠆

坡文

古今事實

收養蜜蜂

遠方諸山郡僻處出蜜蠟所著皆絕巖石壁非攀緣所
及惟於山頂以檻輦自懸挂下遂乃得取其處人家有
養蜂者其法以木為器成十斛五斛開小孔令纔容蜂

出入以蜜蠟塗器內令遍安着簷前或庭下春月此蜂
分窠時來過人家園垣者捕取得三兩頭便納諸器中
數宿出蜂飛去尋將伴來還或多或少終日漸益不可
復數遂得往往來器中所滋長甚衆

博物志

稷蜂不蟄

以下係衆蜂

稷蜂不蟄社鼠不燠非以稷蜂社鼠之神也其所托者

然也

韓詩外傳

假蜂進讒

見後母門

蜂集不祥

豫章嚴豐字孟侯為郡主簿太守賈萌舉兵欲誅王莽
有飛蜂附萌車衡豐諫以為不祥之徵萌不從果見殺

謝承後
漢書

仙翁吐蜂

葛仙翁與客對食客曰食畢當先作一奇戲食未竟仙
翁曰諸公得無欲見乎即吐口中飯盡成飛蜂滿屋或
集客身莫不震肅但自不螫人耳良久仙翁乃張口見

蜂皆飛還入口中成飯食之

別傳

蜂鑽窻紙

神瓚禪師見蜂子投窗紙求出師曰世界如許廣闊不

肯出鑽他故紙

傳燈錄

俗啖蜂兒

唐劉恂魯遊宣歙間見彼衆人好食蜂兒狀如蠶蛹而潔瑩白大蜂結房於山林間其大如巨鍾其中不知幾百層村人採時須以草衣蔽身以捍毒螫復以煙火逼

散蜂母然後攀援崖樹斷其根一房有蜂兒五斗或一石三分之一翅足具矣即入鹽酪炒之曝乾以小紙囊貯之寄入京洛以為方物

嶺表錄異

古今文集

雜著

記蜂

王元之

商於兔和寺多蜂寺僧為余言之事甚具予因問蜂之有王其狀何若曰其色青蒼差大於常蜂耳問胡以服

其衆曰王無毒不識其他問王之所處曰窠之如營必
造一臺其大如粟俗謂之王臺王居其上且生子其中
或三或五不常其數王之子盡復為王矣歲分其族而
去山毗患蜂之分也以棘刺闕於王臺則王之子盡死
而蜂不析矣又曰蜂之分也或團如罌或鋪如扇擁其
王而去王之所在蜂不敢螫失其王則潰亂不可嚮邇
凡取其蜜不可多多則蜂饑而不蕃又不可少少則蜂
惰而不作予愛其王之無毒似以德而王者又愛其王

之子盡復為王似一姓一君上下有定分者也又愛其王之所在蜂不敢螫似法令之明也又愛其取之得中似什一而稅也至於刺王之臺使絕其息不仁之甚矣故總而記云

古詩

採蠟一章

顧況

採蠟怨奢也荒巖之間有以續蒙其身腰藤造險及有羣蜂肆毒哀呼不應則上捨藤而下沈壑

採採者蠟於泉石兮煌煌中堂列華燭兮新歌善舞弦
柱促兮荒巖之人自取其毒兮

蜜

楊廷秀

燕銜芹根泥蜂掇花上
藍帶雨兩股飛所取日能幾調
和露與英凝甘滑於髓天寒百蟲蟄割房霜在已燕已
成雛歸蜂憂凍餒死乃見萬物心多為造化使

收蜜蜂

蘇子由

空中蜂隊如車輪
中有王子蜂中尊
分房減口未有處

野老解與蜂語言前人傳蜜延客住後人秉艾催客奔
布囊包裹間如市出入竹屋新具完小窗出入旋知路
幽圃首夏花正繁相逢處處命儔侶共入新宅長子孫
今年活計知尚淺蜜蠟未暇分主人明年少割助和藥
慙愧野老知利源

蜜酒歌

并序

蘇子瞻

西蜀道士楊世昌善作蜜酒絕醇醖余得其
法作此歌遺之

真珠為漿玉為醴六月田夫汗流泚不如春甕自生香
蠟為耕耘花作米一日小沸魚吐沫二日眩轉清光活
三日開甕香滿城快瀉銀餅不須潑百錢一斗濃無聲
甘露微濁醍醐清君不見南國採花蜂似雨天教釀酒
醉先生先生年來窮到骨問人乞米何曾得世間萬事
真悠悠蜜蜂大勝監河侯

和子瞻蜜酒

蘇子由

蜂王舉家千萬口黃蠟為糧蜜為酒口銜澗水拾花鬚

沮如滿房何不有山中醉飽誰得知割脾分蜜曾無遺
調和知與酒同法試投麴蘖誠相宜城中禁酒如禁盜
三百青銅愁杜老先生年來無俸錢一斗徑須囊一倒
舖糟不聽漁父言煉蜜深愧仙人傳掉頭不問辟穀藥
忍饑不如長醉眠

蜂兒

楊廷秀

蜜蜂不食人間倉玉露為酒花為糧作蜜不忙採花忙
蜜成猶帶百花香蜜成萬蜂不敢嘗要輸蜜國供蜂王

蜂王未及享人已割蜜房老饕吏來搜我室老蜂無味
祇有滓平幼蜂初化未成兒老饕火攻不知止既入我
室取我子

螟蛉

附 螺 贏

羣書要語螟蛉似步屈桑上小青蟲也詩尺蠖又呼步

屈

方 言

螺贏蒲盧也注俗呼蠓螽音咽螽爾雅似蜂而細腰詩

古今事實

羸祝螟蛉

螟蛉之子殪而逢螺羸祝之曰類我類我久則肖之矣

楊子

政者蒲盧

係螺羸見
官政門

古今文集

雜著

螟蛉賦

歐陽永叔

爰有桑蟲實曰螟蛉與夫螺羸異類殊形負以為子祝

之以聲其子感之朝夕而成嗟夫人子父母所生父祝之聲子莫之聽父傳之業子莫克成父歿母死身覆位傾嗚呼為人孰與蟲靈人不如蟲曷以人稱

嘗觀螺贏所負不但螟蛉或取螭子磔而斃之因產一小卵於其上俟其卵化而成形漸食所負之蟲久乃寢大生翼飛去古人精於物理類我之說或他有所據耶余因編入此部聊記於此以俟博物君子考焉

蝴蝶

羣書要語蛺蝶一名野鵝一名風蝶江東謂之捷末色

白背青者是也其大如蝙蝠或黑色或青斑名曰鳳子

一名鳳車一名鬼車生江南橘樹間

古今注

橘之蠹為蛺

蝶

陸龜蒙
蠹化篇

詩句沙晚低風蝶 風蝶勤依槳 風輕粉蝶喜

並杜揚

揚弄芳蝶

韓

娟娟戲蝶過閒幔

留連戲蝶時時見

穿花蛺蝶深深見

並杜

身似何郎全傅粉心同韓壽暗偷

香謝無逸

古今事實

夢為蝴蝶

昔莊周夢為蝴蝶栩栩然蝴蝶不知周也俄然覺則遽遽然周也不知周之夢為蝴蝶蝴蝶之為周周與蝴蝶

必有分矣此謂物化

莊子

蝴蝶輕薄

北齊魏收嘗在洛京輕薄尤甚人號為驚蛺蝶

翅有金眼

衛公得峽中蝴蝶翅闊四寸餘深褐色每翅上有二金

眼

雜組

畫撲蝶圖

周昉有畫撲蝶圖一卷

藝文志

古今文集

古詩

鬼蝶

蘇子瞻

雙眉卷鐵絲兩翅暈金碧初來花爭妍忽去鬼無迹

律詩

六言

黃魯直

蝴蝶雙飛得意偶然畢命網羅羣蟻爭收墜翼策勲歸
去南柯

山谷詩意謂二蘇而有譏焉詩雖小清婉而意足

殆詩之法言也

蔡載集

蝶

李嶠

飛來繡戶陰穿過畫樓深重傳秦臺彩輕塗漢殿金相
無惟柳絮所得是花心可要凌孤客邀為子夜吟

蝴蝶

鄭谷

尋艷復尋香似閒還似忙暖煙沈蕙徑微雨宿花房書
幌輕隨夢歌樓誤採粧王孫深屬意繡入舞衣裳

絕句

李義山

青陵臺畔日光斜萬古貞魂倚暮霞莫許韓憑見鴛鴦門為

蛺蝶等閒飛上別枝花

蝶

王介甫

翅輕於粉薄於繒長被花牽不自勝若信莊周尚非夢
豈能投死為韓憑

道傍小憩觀物化

楊廷秀

蝴蝶新生未解飛鬚拳粉濕睡花枝後來借得風光力
不記如癡似醉時

蟬

羣書要語蜩螳蜩蟬蜩螗蜩螗蜚蜚也蜚茅蜩也蜩馬蜩也

蛻寒蛭也

爾雅

海岱之間謂之蟬通語也

詩

蟬化爲

腹育腹育轉爲蟬生兩翼

王充論衡

其殼曰蛻

本草

蟬無口

而鳴

淮南子

蠶食而不飲蟬飲而不食

同上

仲夏之月蟬

始鳴季夏之月寒蟬鳴

月令

范則冠而蟬有綏注綏謂

蛭喙長在腹下

禮記

五月鳴蛭

七月

如蛭如蟾

蕩詩

鳴蛭

嘒

小弁

詩句鳴蟬厲寒音

潘岳

夕響鳴山郭

韋應物

落日鳴蟬蛭

森木亂啼蟬

抱葉寒蟬靜

並杜

驚蟬移別柳

唐詩

蟬噪林

逾靜

王維

蟬曳殘聲過別枝

唐詩

涼夜偏棲桐葉露曙天靜

噪柳枝風

韓溉

古今事實

寒蟬翔水

文子曰飛鳥反鄉兔反歸窟狐死首丘寒蟬

蜺也

翔水各

依所生

蜩笑鵬飛

見鵬門

蟬鳴齊女

牛亨問董仲舒曰蟬名齊女何故答曰昔齊王之后怨王而死屍變為蟬登庭樹嚙喉而鳴王悔恨之故名齊

女

崔豹古今注

漢官金蟬

應邵漢官儀曰侍中金蟬左貂金取剛百煉不耗蟬居高飲而口在腋下貂內勁而外溫

螳螂捕蟬

見黃雀門

蟬有五德

陸雲曰昔人稱雞有五德至於寒蟬才齊其美而莫斯
述夫頭上有綏則其文也含氣飲露則其清也黍稷不
享則其廉也處不巢居則其儉也應候守節則其信也

寒蟬
賦序

飛蟬集冠

梁朱异為通事舍人後除中書郎時秋日始拜有飛蟬
正集昇冠上時咸謂蟬珥之兆

古今文集

雜著

蟬賦

曹植

惟夫蟬之清潔潛厥類於太陰在炎陽之仲夏兮始遊
豫乎芳林實淡泊而寡慾兮獨怡樂而長吟聲噉噉而
彌厲兮似貞士而介心內含和而弗食兮與衆物而無
求棲喬枝而仰首兮漱朝露之清流隱柔桑之稠葉兮
快啁號以遁暑苦黃雀之作害兮患蟪蛄之勁斧飄高
翔而遠托兮毒蛭蛛之網罟欲降身而卑竄兮懼草蟲

之襲予免衆艱而弗獲兮遙遷集乎宮宇依名果之茂
蔭兮託修榦以靜處有翩翩之狡童兮步容與於園圃
體離朱之脫視兮姿才捷於猴猿條罔葉而不挽兮樹
無幹而不緣翳輕軀而奮迅兮跪側足以自閑恐此身
之驚駭兮精曾眈而目連怪柔竿之冉冉兮還微粘而
我纏欲翻飛而逾滯兮知性命之長捐亂曰詩嘆鳴啁
聲嚶嚶兮盛陽則來太陰逝兮皎皎貞素倖夷惠兮帝
臣是戴尚其潔兮

黏蟬賦

并序

傅咸

櫻桃為樹則多陰為果則先熟有蟬鳴焉聊命黏取退
惟當蟬之得意於斯樹不知黏之將至亦猶人之得意於
富貴而不虞禍之將來也

有嘉果之珍樹蔚弘覆於我庭在赫赫之隆暑獨肅肅
而自清遂寓目以周覽見鳴啁於纖枝翳翠葉以長吟
信厥樂之在茲苟得意於所歡曾往黏而莫知匪爾命
之適薄坐偷安而忘危嗟悠悠之耽寵請茲覽以自規

鳴蟬賦

歐陽永叔

嘉祐元年夏大雨水奉詔祈晴於醴泉宮聞鳴蟬有感而賦云肅祠庭以祇事兮瞻玉宇之崢嶸收視聽以清慮兮齋予心以薦誠因以靜而觀動兮見乎萬物之情於時朝雨驟至微風不興四無雲以青天雷隱隱其餘聲乃席芳藹臨華軒古木數枝空庭草間爰有一物鳴於樹顛引清風以長嘯抱纖柯而未歡嚙嚙非管泠泠若弦裂方號而復咽淒欲斷而還連吐孤韻以難律含

五音之自然吾不知其何物其名曰蟬豈非因物造形
能變化者耶出自糞壤慕清虛者耶凌風高飛知所止
者耶嘉木茂樹喜清陰者耶呼吸風露能尸解者耶綽
約雙鬚出嬋娟者耶其為聲也不樂不哀非宮非徵胡
然而鳴亦胡然而止吾嘗悲夫萬物莫不好鳴若乃四
時代謝百鳥嚶兮一氣候至百蟲驚兮嬌兒姍女語鸝
鷯兮鳴機絡緯響蟋蟀兮轉喉弄舌誠可愛兮引腹動
股豈勉強而為之兮至於汚池濁水得雨而聒兮飲泉

食土長夜而歌兮彼蝦蟆固若有欲而蚯蚓又何求兮
其餘大小萬物不可悉名各有氣類隨其物形不知自
止有若爭能忽時變以物變咸漠然而無聲嗚呼達士
所齊萬物一類人於其間所以為貴蓋已巧其語言又
能傳於大字是以窮彼思慮耗其血氣或吟哦其窮愁
或發揚其志意雖共盡於萬物乃長鳴於百世予亦安
知其然哉聊為樂以自喜方將考得失較同異俄而陰
雲復興雷電俱擊大雨既作蟬聲遂息

朱文公曰賦須是縝密盛得水住歐公蟬賦其名

曰蟬這數句也無味

朱子語錄

古詩

蟬

蘇子瞻

蛻形污濁中羽翼便翾好秋來間可闊已抱寒莖槁

蟬

褚雲

避雀喬枝裏飛空華殿曲天寒響屢嘶日暮聲逾速繁
吟如欲盡長韻還相續飲露非表清輕身易知足

春蟬

元稹

我自東歸日厭苦春鳩聲作詩憐化工不遣春蟬生及
來商山道山深氣不平春秋兩相似蟲豸百種鳴風松
不成韻蜩蟬如沸羹豈無朝陽鳳羞與微物爭安得天
上雨奔渾河海傾蕩滌反時氣然後好清風

律詩

蟬

方干

細聲頻斷續審聽亦難分
髣髴應移處從容却不聞
蘭

棲朝咽露樹隱吟雲若遣鄉愁起吾懷只是君

聽蟬

楊廷秀

一隻初來報早秋又添一隻說新愁兩蟬對語雙垂柳
知鬪先休鬪後休一殼空空紙樣輕風前却有許多聲
叫來叫去渾無事叫到詩人白髮生說露談風有典章
咏秋吟夏入宮商蟬聲無一些煩惱自是愁人枉斷腸

蜨娘

附螳娘

羣書要語蜨蜨娘娘也注黑甲蟲噉糞者也

爾雅

螳螂有斧蟲一名螳蟻

爾雅

仲夏之月螳螂生注螬蛸母

也

記月令

古今事實

螳螂轉丸

莊子曰蛄蜥之智在於轉丸蜥螳能以土包糞轉成丸

螳螂捕蟬

莊子曰莊周游於雕陵之樊覩一異鵲自南方來者執

彈而留之

留伺其便

覩一蟬方得美蔭而忘其身螳螂執翳

且搏之見得而忘其形異鵲從而利之見利而忘其真
莊周惕然曰噫物固相累二類相召也捐彈而反走

說二

見黃
雀門

怒臂當車

齊莊公出獵有螳螂舉足將搏其輪問其御曰此何蟲
對曰此螳螂也為蟲知進而不知退不量力而輕就敵

公曰此為天下勇士矣迴車避之勇士歸焉

淮南子

古今文集

古詩

蟋蟀

蘇子瞻

洪鐘起暗室飄瓦落空庭誰言轉丸手能作殷牀聲

促織

羣書要語莎雞一名促織一名絡緯一名蟋蟀古今注蟋

蟀音蟀也

雅

季夏之月蟋蟀居壁

月令

六月莎雞振羽七月

在野八月在宇九月在戶十月蟋蟀入我牀下七月蟋蟀

在堂歲聿其暮

國風

里語曰促織鳴懶婦驚

詩疏

風戾戾而

動柯露零零而隕樹月轉景而西顏漢回波而東注厲

清響於長宵激悲聲以迄曙

盧湛蟋蟀賦

蟋蟀俟秋吟

王褒頌

滲容與而獨倚兮蟋蟀鳴於西堂

楚詞

詩句促織鳴東壁

選

蟋蟀依桑野

選

客愁連蟋蟀

杜

蟋

蟀近中堂

杜

蟋蟀鳴牀帷

杜

蟋蟀甚微細哀鳴何動人

杜幽響泄潛蛩

韓

古今事實

關

古今文集

雜著

放促織賦

楊廷秀

楊子朝食既徹步而園嬉遙見一二稚子集乎遠華之
堂環焉其若圍俯焉其若窺躡焉其若追也楊子趨而
往視之蓋促織之始生而尚微墮地而未能飛者也嘉
遯而不市故高步而不卑辟穀而不飪故癯貌而不肥
既蚱蜢其修髯亦翡翠其薄衣彼其臂短而脰甚長是
故將進而趑趑翹立而孤危也楊子笑謂稚子曰汝豈

識之乎是固夫霜淒露感而恤緯征人之裳者歟身勤
心苦而提耳女工之荒者歟晝閒宵喧自基而徂堂者
歟多言強聒身隱而聲彰者歟若悲若怨若憤若歎而
吟嘯秋夕之清長者歟奚失據於幽茂而涉身於躡籍
若是其幼且孱也乃命穉子藉以羽扇遷之叢間見密
葉其躍如曝冬日其欣然穉子反命曰是蟲也若子產
之魚圉圉焉洋洋焉矣使穉子反視之至則行矣

古詩

促織

蘇子瞻

月叢號耿耿露葉泣漙漙夜常不自暖那憂公子寒

律詩

促織

杜甫

促織甚微細哀音何動人草根吟不穩牀下夜相親久
客得無淚故妻難及晨悲絲與急管感激異天真

促織

楊廷秀

一聲能遣一人愁終夕聲聲曉未休不解縲絲替人織

强來出口促衣裘

螢

羣書要語螢火一名暉夜一名燐一名丹良一名丹鳥

夜光一名宵燭腐草之所化古今注一名夜照一名熠燿

王氏本草夏小正曰丹鳥羞白鳥丹鳥者謂丹良也白鳥者

謂蚊蚋也其謂之鳥者重其養也凡有翼者為鳥羞也

羞者進也大戴禮季夏之月腐草為螢月令熠燿宵行東類

君子之有道入暗室而不欺同至人之無迹懷明義以

應時

駱賓王賦

詩句暗飛螢自照

杜

螢光拂夕流

韋應物

螢鑒綠帷徹

杜

日暮拾流螢

杜

騰空類星隕拂木若花生

梁簡文帝

風亂池

上螢露光竹間月

李嶷

古今事實

佩螢火丸

務成子螢火丸方云漢武威太守劉子南從道士尹公授其方合而佩之永平中於武威北界遇敵戰敗為寇

所圍天下如雨未至于南馬數尺矢輒墮地終不能中
傷敵以為神人乃解圍去

神仙感應篇

囊螢照書

車胤字武子家貧無燈火以絹囊盛螢火以照書夜讀

聚螢夜放

隋煬帝大業末天下已盜起帝於景華宮徵求螢火數
斛夜出遊山如放火光徧巖谷

古今文集

雜著

螢賦 并序

傅咸

余曾獨處夜不能寐顧見螢火遂有感於是執以自照而為之賦其詞曰

潛空館之寂寂兮意遙遙而靡寧夜耿耿而不寐兮憂悄悄而多傷哀斯火之煙滅兮近腐草而化生感詩人之攸懷兮覽熠燿於前庭不以姿質之鄙薄兮欲增輝乎太清雖無補於日月兮期自照於陋形當朝陽而戢

景兮必宵昧而是征進不競於天光兮退在晦而能明
諒有似於賢臣兮於疎外而盡誠蓋物小而喻大兮固
作者之所旌假乃光而喻爾職兮庶有表乎潔貞

古詩

秋螢引

劉禹錫

漢陵秦苑遙蒼蒼陳根腐葉秋螢光夜空寂寥金氣靜
千門九陌飛悠揚紛紛輝映互明滅金爐星噴燈花發
露華洗濯清風吹攢茆不定招搖垂高麗孳愚過珠網

斜歷璇題舞羅幌曝衣樓上拂香裙承露臺前轉仙掌
槐市諸生夜對書北窗分明辨魯魚行子東山起征思
中郎騎省悲秋氣銅雀人歸自入簾長門帳開來照淚
誰言向晦常自明童子走捕嬌女爭天生有光非自銜
遠近低昂暗中見撮蚊妖鳥亦夜飛翅如車輪人不
見

螢火

陳去非

翩翩飛蛾撲明燭見烹膏油罪莫贖嘉爾螢火不自欺

草間相照光煜煜却馬已錄仙人方映書曾登君子堂
不畏月明見陋質但畏風雨難為光

律詩

見螢火

杜甫

巫山秋夜螢火飛簾疎巧入坐人衣忽驚屋裏琴書冷
復亂簷前星宿稀却繞井欄添箇箇偶經花蕊弄輝輝
滄江白髮愁看汝來歲如今歸未歸

螢

梁元帝

水殿清秋玉戶開
飛光千點去還來
無風無月長門夜
頻到堦前點綠苔

徘徊無燭冷無煙
秋徑莎庭入夜天
休向書窻來照字
近來紅蠟滿歌筵

古今事文類聚後集卷四十八